

**ILUARSIISSUT**

Isumaliutissiissut 23. maaji ullulernerqarsimasoq taarserpaa

(Inassuteqaammi Naalakkersuisut allannguutissatut siunnersuuteqarsimasutut kukkusumik allanneqarsimanera iluarsineqarpoq)

**Inatsisartut aalajangiiffigisassaattut siunnersuut Inatsisartunut Siulittaasoqarfik partiit tapiissutaat pillugit inatsimmi allannguutissatut siunnersuummik saqqummiussinissaat Namminersorlutik Oqartussani ukiumut sipaaruteqartarnissaq aammalu partiit akunnerminni aningaasatigut naligiingissuseq annikillisarnissaa siunertaralugu. Partiinut tapiissuteqartarneq pillugu inatsimmi allannguutissatut siunnersuuteqarnermi suliniutit uku ilaatinneqassapput: 1. Partiinut tungaviumik tapiissutit ukiumut 1 million kr.-mut qaffanneqassaaq 2. Qaffasinnerpaaffissaanut killiliussaq atuutsinneqalissaaq taamaasilluni annertunerpaamik qinigaatitanut tapiissutigineqartartoq qinikkanut arfinilinnut killiliunneqarluni**

**pillugu**

**Inatsisinut Ataatsimiititaliap**

**siunnersuutip aappassaaneerpeqarneranut**

**ISUMALIUTISSIISSUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Anders Olsen, Siumut, siulittaasoq  
Inatsisartunut ilaasortaq Aqqalu Jerimiassen, Atassut, siulittaasup tullia  
Inatsisartunut ilaasortaq Harald Bianco, Inuit Ataqaatigiit  
Inatsisartunut ilaasortaq Mariia Simonsen, Inuit Ataqaatigiit  
Inatsisartunut ilaasortaq Mala Høy Kúko, Siumut

Ulloq 10. maaji 2022-mi siullermeerinninnerup kingorna ataatsimiititaliap siunnersuut misissorpaa.

**Siunnersuutip imarisaa siunertaalu**

partiinut tungaviumik tapiissutit ukiumut 1 million koruuninik qaffanneqarnissaannik aammalu qinigaatitanut tapiissutigineqartartoq qinikkanut arfinilinnut killilerneqarnissaannik

ilanngussinissamik imaqartumik partiinut tapiissuteqartarnek pillugu inatsimmut allannguutissatut siunnersuummik Inatsisartut Siulittaasoqarfiata saqqummiussinissamut peqquneqarnissaa siunnersuutip kingunerissavaa.

### **Allannguutissatut siunnersuummik saqqummiussineq**

Siunnersuutip siullermeerneqarnerani Atassut allannguutissatut siunnersuummik imaattumik saqqummiussivoq:

*Inatsisartunut Siulittaasoqarfik partiit tapiissutaat pillugit periusissamik nutaamik ujjartueqqullugu misissueqqissaartoqarnissaanik Inatsisartut aalajangiiffigisassaattut siunnersuut, siunnersuummi siulittaasoqarfik inatsisartunit pisinnaatinneqassasoq partiinut tapiisarnermik periutsimik nutaamik suliaqaqqullugu UPA2023-imi qaqqinneqartussamik*

### **Ataatsimiititaliap siunnersuummik suliarinninnera**

Ataatsimiititaliap maluginiarpa, partiinut tapiissuteqartarnek pillugu inatsisip tunngaviusumik ilusaa malillugu tunngaviusumik tapiissutit qassinik qinigaatitaqarnek apeqquatainnagu partiit aningaasartuutaannut matussusiissasut, aammalu qinigaatitaqarnermut tapiissutigineqartartoq partiip Inatsisartuni qinigaatitaasa amerlassusaannut atatillugu aningaasartuutit qinigaatitaqarnermut tapiissutinit matussuserneqassasut. Taamaalilluni tunngaviusumik tapiissutit qinigaatitaqarnermullu tapiissutit immikkoortinneqarneranni siunertaavoq partiit pisariaqartitat eqqarsaatigalugit assigiimmik atugassaqartinneqarnissaat.

Partiit qinigaatitaasa amerlassusaat apeqquatainnagu aningaasartuutaat assersuutigalugu tassaapput oqaaseqaasiornermi allatsinut aamma nutserisoqarnermut aningaasartuutit aamma partiip naatsorsuutaasa kukkunersiorneqarnerannut aningaasartuutit.

Aningaasartuutit qassinik qinigaatitaqarnermut attuumassuteqartut assersuutigalugu tassaapput § 37 naapertorlugu apeqquasiornermut, ilaasortat siunnersuusianut, allatsinut nutserisoqarnermullu aningaasartuutit kiisalu ilaasortat paasisassarsiorlutik angalasarnerannut aningaasartuutit.

Qinigaatitanut tapiissutigineqartartup annerpaaffissaanik killiliussinissamik siunnersuuteqarnek partiinut tapiissuteqartarnek pillugu inatsisip tunngaviusumik ilusiligaaneranut naapertuutinngilaq, ataatsimiititaliamillu paasiuminaatsinneqarluni. Partiimmi 14-inik qinigaatitalik partiimiit arfinilinnik qinigaatitalimmiit, Inatsisartuni politikikkut sulinissaminut tapiiffigineqarnerunissaminut pisariaqartitsinerusussaanera assortorneqarsinnaanngilaq. Partiit annerit partiinut tapiissutinik annertuallaanik pissarsisartut siunnersuuteqartoq isumaqarpat, annerpaaffissatut killiliussinissamik siunnersuuteqarnermut taarsiullugu qinigaatitanut tapiissutigineqartartup appartinnissaa aaqqiissutissatut


toqqassallugu tunngavissaqarluarnerussagaluarpoq.

**Ataatsimiititaliap inassuteqaatai**

Ataatsimiititaliami amerlanerussuteqartut Inuit Ataqatigiinneersut Siumumeersullu siunnersuutip aamma allannguutissatut siunnersuutip itigartinneqarnissaa inassutigaat.


Ataatsimiititaliami ikinnerussuteqartut Atassummeersut allannguutissatut siunnersuutip akuerineqarnissaa inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.




---

Anders Olsen  
Siulittaasoq




---

Aqqalu Jerimiassen  
Siulittaasup tullia



---

Harald Bianco



---

Mariia Simonsen



---

Mala Høy Kúko